

15 NOV 1996

Annuar - Exco

KEDUDUKAN EXCO KELANTAN DITENTUKAN BULAN DEPAN

KOTA BAHARU, 15 Nov (Bernama) -- Kedudukan empat anggota Exco Kelantan yang enggan meletak jawatan akan diumumkan secara rasmi selewat-lewatnya bulan depan, kata Timbalan Pengerusi Perhubungan Umno Kelantan, Datuk Annuar Musa.

Presiden Umno, Datuk Seri Dr Mahathir Mohamad, akan mengumumkan nasib mereka sama ada mereka perlu meletak jawatan atau sebaliknya, katanya kepada pemberita pada majlis kesyukuran kemasukan bekas anggota Parti Melayu Semangat 46 (S-46) ke dalam Umno di kediamannya di Bukit Marak dekat sini hari ini.

Keempat mereka ialah Timbalan Menteri Besar Kelantan, Datuk Rozali Isohak, Nik Mustafa Nik Loding, Kpt (B) Mohamad Nor Ahmad dan Daud Jaafar, ekoran putusannya hubungan antara S-46 dengan PAS dalam ikatan longgar Angkatan Perpaduan Ummah, awal tahun ini.

Ia disusuli pula kemasukan mereka dalam Umno apabila S-46 dibubarkan secara rasmi dua bulan lepas.

Annuar berkata, keputusan mengenainya sudah ada ditangan Presiden yang juga Pengerusi Perhubungan Umno Kelantan dan beliau akan mengumumkan di Kelantan dalam lawatan rasminya ke Kelantan atau di Kuala Lumpur.

Sehubungan dengan itu Rozali dan Setia Usaha Barisan Nasional (BN) Kelantan ditugaskan membentuk satu jawatankuasa bertindak bersama dan draf mengenainya sudah siap dirangka dan diteliti sebelum diserahkan kepada Presiden parti.

Beliau berkata, jawatankuasa yang disertai oleh bekas anggota S-46 itu akan diterima pakai sehingga pilihanraya umum akan datang.

Annuar berkata selain itu, bekas anggota S-46 juga akan diberi peluang menduduki jawatankuasa-jawatankuasa bahagian, pemuda dan wanita sekiranya layak dan ada kekosongan.

Umno Bahagian Peringat katanya mendahului Umno bahagian lain yang melantik bekas Ketua S-46 Bahagian Peringat, Encik Safie Salleh sebagai anggota jawatankuasa bahagian itu.

Bekas Ketua Pemuda Bahagian S-46 Peringkat, Razali Yusuf pula dilantik menduduki jawatankuasa pemuda bahagian itu apabila seorang anggota jawatan kuasanya mengundur diri secara sukarela untuk memberi peluang kepada Razali.

Ketika ditanya mengenai desas desus kemungkinan bekas Presiden S-46, Tengku Razaleigh Hamzah dilantik sebagai Pengerusi Perhubungan Umno Kelantan untuk menggantikan Dr Mahathir beliau berkata Presiden parti, berkuasa melantiknya jika beliau mahukanya. --BERNAMA.

WM WAT